

Morning Dogri (NSD) National News Bulletin 12-04-2025

आकाशवाणी

- केन्द्री उद्योग ते बपार मंत्री पीयूष गोयल होरें आखेआ ऐ जे छड़ा बपार समझौतें दी समें—सीमा पूरी करने लेई राष्ट्री हितें कन्नै समझौता नेई कीता जाई सकदा।
- केन्द्र सरकारै नमीं उभरै करदी बपार चुनौतिएं दे हल लेई इक समर्पित वैश्विक शुल्क ते बपार हेल्पडेस्क शुरू कीता ऐ।
- विदेश मंत्री डाक्टर सुब्रह्मण्यम जयशंकर होरें भारत ते अमरीका बश्कार आतंकवाद—रोधी सैहयोग दी बड़ी मती सराहना कीती ऐ।
- राष्ट्रपति द्रौपदी मुर्मु, पुर्तगाल ते स्लोवाकिया दा अपना ऐतिहासिक दौरा संपन्न करियै जंदी रातीं नमीं दिल्ली परतोई आइयां न।
- अर्जेंटीना दे ब्यूनस आयर्स च आई.एस.एस.एफ. निशानेबाजी विश्व कप 2025 दे पैहले चरण च भारत दुई थाहरै पर रेया ऐ। भारत नै सुन्ने दे 4, चांदी दे 2 ते कैह दे 2 तगमें सने कुल 8 तगमे जित्ते न।
- आईपीएल टी20 क्रिकेट च जंदी रातीं चेन्नेई दे एम.ए. चिदम्बरम स्टेडियम च होए दे मुकाबले च कोलकाता नाईट राईडर्स नै मेज़बान चेन्नेई सुपर किंग्स गी 8एं विकटें कन्नै हराई दित्ता।

<><><><><><>

Free Trade Agreement

बपार ते उद्योग दे केन्द्रीय मंत्री पीयूष गोयल होरें जोर पाइयै आखेआ जे बपार समझौतें दी समें सीमाएं गी पूरा करने लेई राष्ट्रीय हितें कन्नै समझौता नेई कीता जाई सकदा। उनें इब्बी आखेआ जे बपार समझौते, दौनें पक्खें लेई फायदेमंद होने लोड़चदे। श्री गोयल होरें कल नमीं दिल्ली च 9में वैश्विक प्रौद्योगिकी सम्मेलन च बोला'रदे हे। उनें अमरीका जनेए जकीनी भ्याल देशें कन्नै भविष्य च विश्व स्तर दे बपार—कारोबार च भारत लेई उपलब्ध मौकें गी उजागर कीता। मुक्त बपार समझौते पर बोलदे होई उनें आखेआ जे समें सीमाएं गी पूरा करने दी महत्वकांक्षी च राष्ट्रीय हितें कन्नै समझौता नेई कीता जाई सकदा। उनें आखेआ जे मुक्त बपार समझौते, बराबरी, इमानदारी ते उत्थूं दे फायदेमंद होने लोड़चदे। उनें आखेआ जे भारत इसलै केई देशें कन्नै बपार समझौतें पर कम्म करा'रदा ऐ जिंदे च यूरोपीय संघ, यूके ते अमरीका शामिल न।

यूरोपीय संघ कन्नै मुक्त बपार समझौते बारे उनें आखेआ जे इस बक्ख प्रगति होई ऐ, पर चुनौतियां बी ऐन, जिंदे च जलवायु सरबंधी नियमें दी पालमा शामिल ऐ। उनें आखेआ जे सूरूप गी नॉन टैरिफ अडचने गी दूर करने पर बचार करना गै होग, की जे इंदे चलदे भारत सनें वैश्विक अर्थबवस्था लेई बपार, कारोबारच अडचनां बनी दियां न।

<><><><><><><>

Global Tariff Help Desk

केन्द्र सरकार नै इक खास ग्लोबल टैरिफ ते ट्रेड हैल्प डैस्क शुरू कीता ऐ जेहड़ा आयात ते निर्यात च समस्याएं च मदद करोग। इस हैल्प डैस्क राएं आयात-निर्यात च मता बाद्धा जां जमाखोरी, माल ढोआई जां सप्लाई चेन च अडचने, जां बैंकिंग सरबंधी मामलें ते होरने समस्याएं कन्नै निबड़ने च सखाल होग। बपार उद्योग मंत्रालय आस्सेआ जारी ब्यानै च दस्सेआ गेआ ऐ जे एहकड़ा हैल्प डैस्क दुए मंत्रालयें, विभागें जां केन्द्रीय ते राज्य यरकार दी अजेंसिएं गी पेश बपार सरबंधी समस्याएं च बी सहायता उपलब्ध कराग। विश्व स्तर पर आयात निर्यात दी शुल्क दरें च मची दी खलबली ते दूई चुनौतिएं पर बपार, विभाग ते डीजीएफटी आस्सेआ सक्रियता कन्नै तक्क रखी जा'रदी ऐ।

<><><><><><><>

US China

चीन दा अमरीका दे माल-समेयानें पर लाया गेदा 125 प्रतिशत जवाबी शुल्क अज्जै थमां लागू होई जाहग। एह फैसला अमरीका दे राष्ट्रपति डॉनल्ड ट्रंप हुंदे इस हफ्ते चीन पर जवाबी शुल्क बधाइयै 145 प्रतिशत करने दे बाद लैता गेआ ऐ। तोआई, चीन दे राष्ट्रपति शी चिनफिंग होरें यूरोपीय संघ गी अमरीका दी इकतरफा धमकी दा बरोध करने लेई चीन दा साथ देने दा आग्रैह कीता ऐ। उत्थे गै, अमरीका दे राष्ट्रपति होरें आखेआ ऐ जे 9 जुलाई तगर अमरीका दे कन्नै समझौता करने च नाकाम रौहने आहले मुल्खें पर परतियै जवाबी शुल्क लाडन।

<><><><><><><>

EAM Indo US

विदेशमंत्री डॉ. एस. जयशंकर होरें भारत ते अमरीका बश्कार आतंकवाद रोधी सैहयोग दी सराहना कीती ऐ। मुम्बई आतंकवादी हमलें दे मुख साजशकर्ता तहव्वुर हुसैन राणा दे प्रत्यर्पण दे बारै च अमरीका दे विदेश मंत्री मार्को रुबियो हुंदे आसेआ कीती गेदी सोशल मीडिया पोस्ट दे परते च उ'नें आखेआ जे इ'नें हमलें दे पीड़ितें गी न्याऽ दोआना जकीनी बनाने लेई एह इक बड्डी गैह ऐ। श्री रुबियो होरें अपने पोस्ट च आखेआ हा जे अमरीका नै तहव्वुर राणा गी 2008 मुम्बई आतंकी हमलें दी योजना बनाने दे आरोपें दा सामना करने लेई भारत दे हवाले करी दित्ता ऐ। उ'नें आखेआ हा जे भारत दे कन्नै अमरीका बी इ'नें हमलें च मारे गेदे 6 अमरीकी नागरिकें सने 166 लोकें गी न्याऽ दोआने दी मंग करदा आया ऐ।

<><><><><><>

Terrorist Killed

जम्मू संभाग दे किश्तवाड़ जिले च छात्तरू आहले जांगली इलाके च सुरक्षाबलें आसेआ चलाए जा करदे आतंकवाद-रोधी अभियान च द'ऊं होर आतंकवादिणं गी मारी-मुकाई दित्ता गेआ ऐ। एहदे शा पैहले जंदे रोज सुरक्षाबलें इक आतंकवादी दा सफाया कीता हा। करठन फ्हाड़ी इलाका ते खराब मौसम दे बावजूद सुरक्षाबलें पूरे तगड़ेयाई कन्नै अपना अभियान जारी रक्खेआ। टाक्करे आहली थाहरै थमां खरी मती मात्रा च थेहार-असलाह ते गोला-बरूद बरामद कीता गेआ ऐ।

<><><><><><>

President Return

राष्ट्रपति द्रौपदी मुर्मू होरें पुर्तगाल ते स्लावाकिया दे दौरे मगरा कल रातीं नमीं दिल्ली परतोई आइयां। इस इतेहासिक दौरे च राष्ट्रपति होरें दौनें राष्ट्रें कन्नै आपसी सरबंधें गी मजबूत करने लेई उच्चे स्तर दी बैठकां लाइयां। उनें स्लोवाकिया दे राष्ट्रपति रोबर्ट फिको ते संसद दे स्वीकर हुंदे कन्नै मलाटी करियै केई मामलें पर बचार बमर्श कीता। राष्ट्रपति होर पुर्तगाल दा दौरा पूरा करने मगरा स्लोवाकिया पुज्जीया हियां। उंदा दौरा नेह समें पर होआ ऐ जिसलै भारत ते यूरोपीय संघ मुक्त बपार समझौते पर गल्लबात च रुज्जे दे न।

<><><><><><>

PM Modi - AIADMK

प्रधानमंत्री नरेन्द्र मोदी होरें राश्ट्री जनतांत्रिक गठबंधन – एनडीए च शामिल होने दे एआईए–डीएमके दे फैसले पर खुशी जाहर कीती ऐ। श्री मोदी होरें सोशल मीडिया पोस्ट च आखेआ ऐ जे एनडीए दे होरनें सैहयोगियें कन्नै मिलियै ओह तमिलनाडु गी तरक्की दी नमीं उंचाई पर लेई जाडन ते राज्य दी पूरी लगन कन्नै सेवा करडन। उ'नें आखेआ जे एनएडीए गठबंधन, ऐसी सरकार जकीनी बनाग जेहड़ी म्हान एम.जी.आर ते तमिलनाडु दिएं साबका मुख्यमंत्री सुरगवासी जयललिता हुंदे विचारें गी मूर्त रूप देग। प्रधानमंत्री होरें आखेआ जे तमिलनाडु दी तरक्की लेई ते तमिल संस्कृति गी संरक्षण देने लेई एह जरूरी ऐ जे भ्रष्ट ते बंडड पोआने आहली डी.एम.के सरकार गी तौले हटाई दित्ता जा ते एनडीए गठबंधन ऐसा गै करोग।

<><><><><><>

Hanuman Jayanti

अज्ज देश भरै च हनुमान जयंती पूरे धार्मिक जोश दे कन्नै मनाई जा'रदी ऐ। नमीं दिल्ली दे कनॉट प्लेस च स्थित प्राचीन हनुमान मंदरै सने राश्ट्री राजधानी दे बक्ख–बक्ख हनुमान मंदरें च बड्डलै थमां गै भक्तों दी भीड़ उमड़ा करदी ऐ। मंदरें च हनुमान चालीसा, सुंदर कांड ते अखंड रामायण दा पाठ कीता जा'रदा ऐ। उत्तर प्रदेश दे प्रमुख हनुमान मंदरें च बी बड़ी मती गिनतरी च लोक मत्था टेकने लेई पुज्जा करदे न। इ'आं गै अयोध्या दे हनुमान गढ़ी मंदरै च बी लोकें दिआं लम्मियां–लम्मियां रीडां दिक्खियां जा'रदिआं न। जम्मू शैहरा च बी श्री हनुमान जयंती दा पर्व पूरे धार्मिक श्रद्धा ते उत्साह कन्नै मनाया जा'रदा ऐ। शैहरा दिएं केई थाहरें पर भंडारें दा बी आयोजन कीता गेदा ऐ।

<><><><><><>

Waves Summit

सूचना ते प्रसारण मंत्रालय नै थीम संगीत प्रतियोगिता दे जेतूएं दा ऐलान करी दित्ता ऐ। एह वेक्स शिखर सम्मेलन 2025 दे तैहत आयोजित कीती जा'रदी 32 चुनौतियें चा इक्क ऐ। पैहला वेक्स शिखर सम्मेलन इस ब'रे पैहली थमां 4 मई तगर मुंबई च आयोजित होग। पूरे देशै थमां हासल सैकड़ां बद्धे एन्ट्रीएं चा 6 जेतूएं गी चुनेआ गेआ ऐ।

इक प्रतिष्ठित निर्णायक मंडल नै जेतूएं दी ताल, उं'दी मौलिकता, संगीत ते नाच दे कन्नै उं'दे तालमेल दे मूल्यांकन दे बाद कीती। मंत्रालय नै आखेआ ऐ जे प्रतियोगिता दा मकसद भारत दी बन्न-सबन्नी संगीत प्रतिभाएं गी प्रदर्शित करना ऐ।

<><><><><><>

Shooting World Cup

अर्जेंटीना दे ब्यूनस आयर्स च आई.एस.एस.एफ. निशानेबाजी विश्व कप 2025 दे पैहले चरण च भारत दुई थाहरै पर रेया ऐ। भारत नै सुन्ने दे 4 तगमें सने, चांदी दे 2 तगमे ते कैह दे 2 तगमें गी रलाइयै कुल 8 तगमे जित्ते न। प्रतियोगिता दे अखीरले ध्याड़े, सौरभ चौधरी ते सुरुचि सिंह दी जोड़ी नै अपने गै देशै दे मनु भाकर ते रविंदर सिंह गी 16-8 कन्नै हराइयै कैह दा तगमा जित्तेआ। भारत लेई तगमे जित्तने आहले होरनें खड्गारिएं च सिफ्त कौर सामरा, रुद्राक्ष पाटिल, सुरुचि सिंह, विजयवीर सिद्धू, ईशा सिंह, चैन सिंह ते आर्य बोरसे ते रुद्राक्ष पाटिल दी जोड़ी शामिल ऐ। विश्व कप 2025 दा दुआ चरण कल पेरु दे लीमा च शुरू होग।

<><><><><><>

IPL

आईपीएल टी-20 क्रिकेट च कोलकाता नाईट राईडर्स नै मेजबान चेन्नई सुपर किंग्स गी 8एं विकटें कन्नै हराई दित्ता। एह मैच कल रातीं चेन्नई दे एम.ए.चिदम्बर स्टेडियम च खेड्डेआ गेआ। अज्ज दपैहरी मगरा साढ़े 3 बजे लखनऊ सुपर जायंट्स दा मकाबला गुजरात टाइटन्स कन्नै लखनऊ च होग ते दूआ मैच अज्ज रातीं साढ़े 7 बजे हैदराबाद च पंजाब किंग्स ते सनराईजर्स हैदराबाद बश्कार खेड्डेआ जाग।

<><><><><><>